

四庫全書

子部

欽定四庫全書

子部

世說新語卷下之下

詳校官侍講學士臣平恕

侍讀臣孫球覆勘

總校官編修臣王燕緒

校對官學正臣蔡必昌

謄錄監生臣周世俊

欽定四庫全書

世說新語卷下之下

宋 劉義慶 撰

梁 劉孝標 注

排調第二十五

諸葛瑾為豫州遣別駕到臺

瑾已見

語云小兒知談卿可

與語連往詣恪

江表傳曰恪字元遜瑾長子也少有才名發藻岐嶷辯論應機莫與為對孫權

見而奇之謂瑾曰藍田生玉真不虛也仕吳至太傅為孫峻所害

恪不與相見後於張

輔吳坐中相遇

環濟吳紀曰張昭字子布忠正有才義仕吳為輔吳將軍別駕喚恪

咄咄郎君恪因嘲之曰豫州亂矣何咄咄之有答曰君明臣賢未聞其亂恪曰昔唐堯在上四凶在下答曰非唯四凶亦有丹朱於是一坐大笑

晉文帝與二陳共車過喚鍾會同載即駛車委去比出已遠既至因嘲之曰與人期行何以遲遲望卿遥遥不至會答曰矯然懿實何必同羣帝復問會臯繇何如人答曰上不及堯舜下不逮周孔亦一時之懿士

二陳臯與泰也

會父名繇故以遥遥戲之臯父矯宣帝諱懿泰父羣祖父寔故以此酬之

鍾毓為黃門郎有機警在景王坐燕飲時陳羣子玄伯

武周子元夏同在坐

魏志曰武周字伯南沛國竹邑人仕至光祿大夫

共嘲毓

景王曰臯繇何如人對曰古之懿士顧謂玄伯元夏曰

君子周而不比羣而不黨

孔安國注論語曰忠信為周阿黨為比黨助也君子雖衆

不相私助

嵇阮山劉在竹林酣飲王戎後往步兵曰俗物已復來

敗人意

魏氏春秋曰時謂王戎未能超俗也

王笑曰卿輩意亦復可敗邪

晉武帝問孫皓

吳錄曰皓字元宗一名彭祖大皇帝孫也景帝崩皓嗣位為晉所滅封歸命侯

聞南人好作爾汝歌頗能為不皓正飲酒因舉觴勸帝
而言曰昔與汝為鄰今與汝為臣上汝一杯酒令汝壽
萬春帝悔之

孫子荆年少時欲隱語王武子當枕石漱流誤曰漱石
枕流王曰流可枕石可漱乎孫曰所以枕流欲洗其耳
逸士傳曰許由為堯所讓其友巢父責之由乃
過清泠水洗耳拭目曰向聞貪言負吾之友所以漱

石欲礪其齒

頭責秦子羽云子羽未詳子曾不如太原溫顥潁川荀寓

溫顥

已見荀氏譜曰寓字景伯祖式太尉父保御史中丞
世語曰寓少與裴楷王戎杜默俱有名仕晉至尚書

陽張華士卿劉許

晉百官名曰劉許字文生涿鹿郡人父放魏驃騎將軍許惠帝時為宗正

卿按許與張華同范陽人故曰士卿互其辭也宗正卿或曰士卿

義陽鄒湛河南鄭詡

晉諸公贊曰湛字潤甫新野人以文義達仕至侍中詡字思淵滎陽開封人為衛騎卿祖泰揚州刺史父褒司

空此數子者或謾喫無宮商或尪陋希言語或淹伊多

姿態或謹譁少智譎或口如含膠飴或頭如巾蓋杵

文士

傳曰華為人少威儀多姿態推意此語則此六句還以目上六人而口如含膠飴則指鄒湛湛辯麗英博而有此稱而猶以文采可觀意思詳序攀龍附鳳並登天府未詳

張敏集載頭責子羽文曰余友有秦生者雖有姊夫之尊少而狎焉同時好暱有太原溫長仁顯穎川荀景伯寓范陽張茂先華士卿劉文生許南陽鄒潤甫湛河南鄭思淵調數年之中繼踵登朝而此賢身處陋巷屢沽而無善價亢志自若終不哀墮為之慨然又怪諸賢既已在位曾無伐木嚶鳴之聲甚違王貢彈冠之義故因秦生容貌之盛為頭責之文以戲之并以嘲六子焉雖似諧謔實有興也其文曰維泰始元年頭責子羽曰吾託子為頭萬有餘日矣大塊稟我以精造我以形我為子植髮膚置鼻耳安眉鬚挿牙齒眸子搞光雙顴隆起每至出入之間遨遊市里行者辟易坐者踈跽或稱君侯或言將軍捧手傾側佇立崎嶇如此者故我形之足偉也子冠冕不戴金銀不佩釵以當笄恰以代幘旨味弗嘗食粟茹菜隈推園間糞壤汙黑歲莫年過曾不自悔子厭我於形容我賤子乎意態若此者乎必子行之累也子遇我如讐我視子如仇居常不樂兩者俱憂

何其鄙哉子欲為人寶也則當如臯陶后稷巫咸伊陟
保乂王家永見封植子欲為名高也則當如許由子威
卞隨務光洗耳逃祿千歲流芳子欲為遊說也則當如
陳軫劇通陸生鄧公轉禍為福令辭從容子欲為進趣
也則當如賈生之求試終軍之請使砥礪鋒穎以幹王
事子欲為恬淡也則當如老聃之守一莊周之自逸廓
然離欲志凌雲日子欲為隱遁也則當如榮期之帶索
漁父之澆澗棲遲神丘垂餌巨壑此一介之所以顯身
成名者也今子上不希道德中不效儒墨塊然窮賤守
此愚惑察子之情觀子之志退不為於處士進無望於
三事而徒玩日勞形習為常人之所喜不亦過乎於是
子羽愀然深念而對曰凡所教敕謹聞命矣以受性拘
係不聞禮義設以天幸為子所寄今欲使吾為忠也即
當如伍胥屈平欲使吾為信也則當殺身以成名欲使
吾為介節邪則當赴水火以全貞此四者人之所忌故
吾不敢造意頭曰子所謂天刑地網剛德之尤不登山

抱木則蹇裳赴流吾欲告爾以養性誨爾以優游而以
蟣蝨同情不聽我謀悲哉俱寓人體而獨為子頭且擬
人其倫喻子儕偶子不如太原溫顯穎川荀寓范陽張
華士卿劉許南陽鄒湛河南鄭嗣此數子者或蹇蹇無
官商或阉陋希言語或淹伊多恣態或謹諱少智諤或
口如含膠飴或頭如巾蠶杵而猶文采可觀意思詳序
攀龍附鳳並登天府夫舐痔得車沈淵得珠豈若夫子
徒令脣舌腐爛手足沾濡哉居有事之世而恥為權圖
譬猶鑿池抱甕難以求富嗟乎子羽何異檻中之熊深
窵之虎石間饑蟹竇中之鼠事力雖勤見功甚苦宜其
拳局剪截至老無所希也支離其形猶
能不困非命也夫豈與夫子同處也

王渾與婦鍾氏共坐見武子從庭過渾欣然謂婦曰生
兒如此足慰人意婦笑曰若使新婦得配叅軍生兒故

可不啻如此

王氏家譜曰倫字太沖司空穆侯中子司徒渾弟也醇粹簡遠貴老莊之學用心淡

如也為老子例略周紀年二十餘舉孝廉不行
歷大將軍叅軍年二十五卒大將軍為之流涕

荀鳴鶴陸士龍二人未相識俱會張茂先坐張令其語

以其並有大才可勿作常語陸舉手曰雲間陸士龍荀

答曰日下荀鳴鶴陸曰既開青雲覩白雉何不張爾弓

布爾矢荀答曰本謂雲龍駢駢定是山鹿野麋獸弱弩

彊是以發遲張乃撫掌大笑

晉百官名曰荀隱字鳴鶴
潁川人荀氏家傳曰隱祖

昕樂安太守父岳中書郎隱與陸雲在張華坐語互相
反覆陸連受屈隱辭皆美麗張公稱善云世有此書尋

之未得歷太子舍人廷尉平蚤卒

陸太尉詣王丞相

陸玩已見

王公食以酪陸還遂病明日與

王賡云昨食酪小過通夜委頓民雖吳人幾為傖鬼

元帝皇子生普賜羣臣殷洪喬謝曰

殷羨已見

皇子誕育普

天同慶臣無勲焉而猥頒厚賚中宗笑曰此事豈可使

卿有勲邪

諸葛令王丞相共爭姓族先後王曰何不言葛王而云

王葛令曰譬言驢馬不言馬驢驢寧勝馬邪

諸葛恢

劉真長始見王丞相時盛暑之月丞相以腹熨彈棊局

曰何乃洶

吳人以冷為洶

劉既出人問見王公云何劉曰未見

他異唯聞作吳語耳

語林曰真長云丞相何奇止能作吳語及細唾也

王公與朝士共飲酒舉瑠璃盃謂伯仁曰此盃腹殊空

謂之寶器何邪

以戲周之無能

答曰此盃英英誠為清徹所以

為寶耳

謝幼輿謂周侯曰卿類社樹遠望之峨峨拂青天就而

視之其根則羣狐所託下聚溷而已

謂顗好媿瀆故

答曰枝條

拂青天不以為高羣狐亂其下不以為濁聚溷之穢卿之所保何足自稱

王長豫幼便和令丞相愛恣甚篤每共園棊丞相欲舉行長豫按指不聽丞相笑曰詎得爾相與似有瓜葛

曰瓜葛疎親也

明帝問周伯仁真長何如人答曰故是千斤犗特王公笑其言伯仁曰不如捲角特有盤辟之好

以戲王也

王丞相枕周伯仁郤指其腹曰卿此中何所有答曰此

中空洞無物然容卿輩數百人

干寶向劉真長

中興書曰寶字令升新蔡人祖統吳奮武將軍父瑩丹陽丞寶少以博學才麗

著稱歷散騎常侍

叙其摻神記

孔氏志怪曰寶父有嬖人寶母至妒葬寶父時因推著藏中經

十年而母喪開墓其婢伏棺上就視猶煖漸有氣息與還家終日而蘇說寶父常致飲食與之接寢恩情如生

家中吉凶輒語之校之悉驗

平復數年後方卒寶因作摻神記中云有所感起是也

劉曰卿可謂

鬼之董狐

春秋傳曰趙穿攻晉靈公於桃園趙宣子未出境而復太史書趙盾弑其君宣子曰不然

對曰子為正卿亡不越境反不討賊非子而誰孔子曰董狐古之良史也書法不隱趙盾古之賢大夫也為法受惡

許文思往顧和許顧先在帳中眠許至便徑就牀角枕

共語

許琛已見

既而喚顧共行顧乃命左右取枕上新衣易

已體上所著許笑曰卿乃復有行來衣乎

康僧淵目深而鼻高王丞相每調之僧淵曰鼻者面之

山

管輅別傳曰鼻者天中之山相書曰鼻之所在為天中鼻有山象故曰山

目者面之淵山

不高則不靈淵不深則不清

何次道往瓦官寺禮拜甚勤

充崇釋氏甚加敬也

阮思曠語之曰

卿志大宇宙

尸子曰天地四方曰宇住古來今曰宙

勇邁終古

終古往古也楚辭曰

吾不能忍此終古也何曰卿今日何故忽見推阮曰我圖數千戶

郡尚不能得卿廼圖作佛不亦大乎

思曠裕也

庾征西大舉征胡既成行止鎮襄陽

晉陽秋曰翼率衆入沔將謀伐狄既

至襄陽狄尚彊未可決戰會康帝崩兄冰薨留長子方之守襄陽自馳還夏口殷豫章與書送

一折角如意以調之

豫章殷羨

庾答書曰得所致雖是敗物

猶欲理而用之

桓大司馬乘雪欲獵先過王劉諸人許真長見其裝束單急問老賊欲持此何作桓曰我若不為此卿輩亦那

得坐談

語林曰宣武征還劉尹數十里迎之桓都不語直云垂長衣談清言竟是誰功劉答曰晉德靈

長功豈在爾二人說小異故詳載之

褚季野問孫盛卿國史何當成孫云久應竟在公無暇

故至今日褚曰古人述而不作何必在蠶室中

漢書曰李陵降

匈奴武帝甚怒太史令司馬遷盛明陵之忠帝以遷為陵遊說下遷腐刑乃述唐虞以來至于麟止為史記遷與任安書曰李陵既生降僕又茸之以蠶室蘇林注曰腐刑者作密室蓄火時如蠶室舊時平陰有蠶室獄

謝公在東山朝命屢降而不動後出為桓宣武司馬將

發新亭朝士咸出瞻送高靈時為中丞亦往相祖先時

多少飲酒因倚如醉戲曰卿屢違朝旨高卧東山諸人

每相與言安石不肯出將如蒼生何今亦蒼生將如卿

何謝笑而不答

高靈已見婦人集載桓玄問王凝之妻謝氏曰太傅東山二十餘年遂復不終

其理云何謝答曰亡叔太傅先正以無用為心顯隱為優劣始末正當動靜之異耳

初謝安在東山居布衣時兄弟已有富貴者翕集家門
傾動人物劉夫人戲謂安曰大丈夫不當如此乎謝乃
捉鼻曰但恐不免耳

支道林因人就深公買印山深公答曰未聞巢由買山

而隱

逸士傳曰巢父者堯時隱人山居不營世利年老以樹為巢而寢其上故號巢父高逸沙門傳曰遁

得深公之言

慙慙而已

王劉每不重蔡公二人嘗詣蔡語良久乃問蔡曰公自言何如夷甫答曰身不如夷甫王劉相目而笑曰公何處不如答曰夷甫無君輩客

張吳興年八歲虧齒

玄之已見

先達知其不常故戲之曰君

口中何為開狗竇張應聲答曰正使君輩從此中出入

郝隆七月七日出日中仰卧人問其故答曰我曬書

征西

寮屬名曰隆字佐治汝
郡人仕吳至征西將軍

謝公始有東山之志後嚴命屢臻勢不獲已始就桓公
司馬于時人有餉桓公藥草中有遠志公取以問謝此

藥又名小草何一物而有二稱

本草曰遠志一名
棘宛其葉名小草

謝未

即答時郝隆在坐應聲答曰此甚易解處則為遠志出
則為小草謝甚有愧色桓公目謝而笑曰郝叅軍此過
乃不惡亦極有會

庾園客詣孫監值行見齊莊在外尚幼而有神意庾試

之曰孫安國何在即答曰庾穉恭家庾大笑曰諸孫大盛有兒如此又答曰未若諸庾之翼翼還語人曰我故

勝得重喚奴父名

孫放別傳曰放兄弟並秀異與庾翼子園客同為學生園客少有佳稱因

談笑嘲放曰諸孫於今為盛盛監君諱也放即答曰未若諸庾之翼翼放應機制勝時人仰焉司馬景王陳鍾諸賢相酬無以踰也

范玄平在簡文坐談欲屈引王長史曰卿助我

范汪別傳曰汪

字玄平潁陽人左將軍晷之孫少有不常之志通敏多識博涉經籍致譽於時歷吏部尚書徐兗二州刺史

王曰此非拔山力所能助

史記曰項羽為漢兵所圍夜起歌曰力拔山兮氣蓋世時

不利兮
驩不逝

郝隆為桓公南蠻叅軍三月三日會作詩不能者罰酒
三升隆初以不能受罰既飲攬筆便作一句云娥隅躍
清池桓問娥隅是何物答曰蠻名魚為娥隅桓公曰作
詩何以作蠻語隆曰千里投公始得蠻府叅軍那得不
作蠻語也

袁羊嘗詣劉恢恢在內眠未起袁因作詩調之曰角枕

粲文茵錦衾爛長筵

唐詩曰晉獻公好攻戰國人多喪其詩曰角枕粲兮錦衾爛兮予美

亡此誰與獨劉尚晉明帝女

晉陽秋曰恢尚廬陵長公主名南弟

主見詩

不平曰袁羊古之遺狂

殷洪遠答孫興公詩云聊復放一曲劉真長笑其語拙

問曰君欲云那放殷曰榆臘亦放何必其鎗鈴邪

殷融已見

桓公既廢海西立簡文

晉陽秋曰海西公諱奕字延齡成帝子也興寧中即位少同閹

人之疾使宮人與左右淫通生子大司馬溫自廣陵還姑孰過京都以皇太后令廢帝為海西公

侍中謝公見桓公拜桓驚笑曰安石卿何事至爾謝曰

未有君拜於前臣立於後

郅重熙與謝公書道王敬仁聞一年少懷問鼎

郅曇王修己見

史記曰楚莊王觀兵於周郊周定王使王孫滿迎勞楚王王問鼎大小輕重對曰在德不在鼎莊王曰子無阻

九鼎楚國折鉤之不知桓公德衰為復後生可畏

春秋傳曰

齊桓公伐楚責苞茅之不貢論語曰後生可畏焉知來者之不如今孔安國曰後生少年

張蒼梧是張憑之祖嘗語憑父曰我不如汝憑父未解

所以蒼梧曰汝有佳兒

張蒼梧碑曰君諱鎮字義遠吳國吳人忠恕寬明簡正貞粹泰

安中除蒼梧太守討王舍有功封興道縣侯

憑時年數歲歛手曰阿翁詎宜

以子戲父

習鑿齒孫興公未相識同在桓公坐桓語孫可與習叅

軍共語孫云蠢爾蠻荆敢與大邦為讐習云薄伐獫狁

至于太原

小雅詩也毛詩注曰蠢動也荆蠻荆之蠻也獫狁北夷也習鑿齒襄陽人孫興公太原人

故因詩以相戲也

桓豹奴是王丹陽外生形似其舅桓甚諱之

豹奴桓嗣小字中興

書曰嗣字恭祖車騎將軍沖子也少有清譽仕至江州刺史王氏譜曰混字奉正中軍將軍恬子仕至丹陽尹

宣武云不恒相似時似耳恒似是形時似是神桓逾不

說

王子猷詣謝萬林公先在坐瞻矚甚高王曰若林公鬚

髮並全神情當復勝此不謝曰脣齒相須不可以偏亡

春秋傳曰唇亡齒寒

鬚髮何關於神明林公意甚惡曰七尺之軀

今日委君二賢

郗司空拜北府

南徐州記曰舊徐州都督以東為稱晉氏南遷徐州刺史王舒加北中郎將北

府之號自此起也

王黃門詣郗門拜云應變將略非其所長驟

詠之不已郗倉謂嘉賓曰公今日拜子猷言語殊不遜

深不可容

倉郗融小字也郗氏譜曰融字景山愔第二子辟琅邪王文學不拜而蚤卒

嘉賓

曰此是陳壽作諸葛評

蜀志陳壽評曰亮連年動衆而無成功益應變將略非其所長

也王隱晉書曰壽字永祚巴西安漢人好學善著述仕至中庶子初壽父為馬謖參軍諸葛亮誅謖髡其父頭

亮子瞻又輕壽故壽撰蜀志以愛憎為評也

人以汝家比武侯復何所言

王子猷詣謝公謝曰云何七言詩

東方朔傳曰漢武帝在栢梁臺上使羣臣

作七言詩七言詩自此始也

子猷承問答曰昂昂若千里之駒汎汎

若水中之鳧

出離騷

王文度范滂期俱為簡文所要范年大而位小王年小而位大將前更相推在前既移久王遂在范後王因謂

曰簸之揚之糠粃在前范曰泚之汰之沙礫在後

王坦之范

啓已見世說是
孫綽習鑿齒言

劉遵祖少為殷中軍所知稱之於庾公庾公甚忻然便
取為佐既見坐之獨榻上與語劉爾日殊不稱庾小失
望遂名之為羊公鶴昔羊叔子有鶴善舞嘗向客稱之
客試使驅來氄氄而不肯舞故稱比之

徐廣晉紀曰劉
爰之字遵祖沛

郡人少有才學能言理
歷中書郎宣城太守

魏長齊雅有體量而才學非所經初宦當出虞存嘲之

曰與卿約法三章談者死文筆者刑商略抵罪魏怡然

而笑無忤於色

魏氏譜曰顗字長祿會稽人祖盾處士父說大鴻臚卿顗仕至山陰令漢書曰

沛公入咸陽名諸父老曰天下苦秦苛法久矣今與父老約法三章耳殺人者死傷人及盜抵罪應劭注曰抵

至也但至於罪

郝嘉賓書與袁虎道戴安道謝居士云恒任之風當有

所弘耳以袁無恒故以此激之

袁戴謝並已見

范啓與郝嘉賓書曰子敬舉體無饒縱掇皮無餘潤郝

答曰舉體無餘潤何如舉體非真者范性矜假多煩故

嘲之

二郤奉道二何奉佛皆以財賄謝中郎云二郤諂於道

二何佞於佛

中興書曰郤愔及弟曇奉天師道晉陽秋曰何充性好佛道崇修佛寺供給沙門以

百數久在揚州徵役吏民功賞萬計是以為遐邇所譏充弟準亦精勤唯讀佛經營治寺廟而已矣

王文度在西州與林法師講韓孫諸人並在坐林公理
每欲小屈孫興公曰法師今日如著弊絮在荊棘中觸
地挂闕

范榮期見郤超俗情不淡戲之曰夷齊巢許一詣垂名

何必勞神苦形支策據梧邪郝未答韓康伯曰何不使

遊刃皆虛

莊子曰昭文之鼓琴師曠之支策惠子之據梧三子之智幾矣皆其盛也故載之末年庖

丁為文惠君解牛三年之後未嘗見全牛也用刀十九年矣所解數千牛而刀刃若新發於硎文惠君問之庖

丁曰彼節者有間而刀刃無厚以無厚入有間恢恢乎其於遊刃必有餘地

簡文在殿上行右軍與孫興公在後右軍指簡文語孫

曰此噉名客簡文顧曰天下自有利齒兒後王光祿作

會稽謝車騎出曲阿祖之

王蘊謝玄已見

王孝伯罷祕書丞在

坐謝言及此事因視孝伯曰王丞齒似不鈍王曰不鈍

頗亦驗

謝遏夏月嘗仰卧謝公清晨卒來不暇著衣跣出屋外

方躡履問訊公曰汝可謂前倨而後恭

戰國策曰蘇秦說惠王而不見

用黑貂之裘弊黃金百斤盡大困而歸父母不與言妻不為下機嫪不為炊後為從長行過洛陽車騎輜重甚衆秦之昆弟妻嫪側目不敢視秦笑謂其嫪曰何先倨而後恭嫪謝曰見季子位高而金多秦歎曰一人之身富貴則親戚畏懼貧賤則輕易之而況於他人哉

顧長康作殷荊州佐請假還東爾時例不給布颿顧苦

求之乃得發至破冢遭風大敗

周祗隆安記曰破冢洲名在華容縣

作颿

與殷云地名破冢真破冢而出行人安穩布颿無恙

符朗初過江

裴景仁秦書曰朗字元達符堅從兄性宏放神氣爽悟堅常曰吾家千里駒也堅為

慕容冲所圍朗降謝玄用為員外散騎侍郎吏部郎王忱與兄國寶命駕詣之沙門法汰問朗曰見王吏部兄弟未朗曰非一狗面人心又一人面狗心者是邪忱醜而才國寶美而狠故也朗常與朝士宴時賢並用唾壺朗欲夸之使小兒跪而張口唾而舍出又善識味會稽王道子為設精饌訖問關中之食孰若於此朗曰皆好唯鹽味小生即問宰夫如其言或人殺雞以食之朗曰此雞棲恒半露問之亦驗又食鵝炙知白黑之處咸試而記之無毫釐之差著符子數十篇蓋老莊之流也朗矜高忤物不容於世後眾讒而殺之

王咨議

大好事問中國人物及風土所生終無極已

王氏譜曰肅之字幼

恭右將軍義之第四子
歷中書郎驃騎咨議

朗大患之次復問奴婢貴賤

云謹厚有識中者乃至十萬無意為奴婢問者止數千
耳

東府客館是版屋謝景重詣太傅時賓客滿中初不交

言直仰視云王乃復西戎其屋

秦詩序曰襄公備其兵
甲以討西戎婦人閔其

君子故作詩曰在其版屋亂我心曲毛公註曰西戎之版屋也

顧長康噉甘蔗先食尾人問所以云漸至佳境

孝武屬王珣求女壻曰王敦桓溫磊砢之流既不可復

得且小如意亦好豫人家事酷非所須正如真長子敬

比最佳珣舉謝混後袁山松欲擬謝婚

續晉陽秋曰山松陳郡人祖喬

益州刺史父方平義興太守山松歷秘書監吳國內史孫恩作亂見害初帝為晉陵公主訪壻於王珣珣舉謝

混云人才不及真長不減子敬帝曰如此便已足矣

王曰卿莫近禁齋

桓南郡與殷荊州語次因共作了語顧愷之曰火燒平

原無遺燎桓曰白布纏棺豎旒旒殷曰投魚深淵放飛

鳥次復作危語桓曰矛頭淅米劍頭炊殷曰百歲老翁

攀枯枝顧曰井上轆轤卧嬰兒殷有一叅軍在坐云盲

人騎瞎馬夜半臨深池殷曰咄咄逼人仲堪眇目故也

中興書曰仲堪父嘗疾患經時仲堪衣不解帶數年自分劑湯藥誤以藥手拭淚遂眇一目

桓玄出射有一劉叅軍與周叅軍朋賭垂成唯少一破

劉謂周曰卿此起不破我當撻卿周曰何至受卿撻劉

曰伯禽之貴尚不免撻而況於卿

尚書大傳曰伯禽與康叔見周公三見而

三笞康叔有駭色謂伯禽曰有商子者賢人也與子見之乃見商子而問焉商子曰南山之陽有木焉名喬二
三子往觀之見喬實高然而上反以告商子商子曰
喬者父道也南山之陰有木焉名曰梓二三子復往觀
焉見梓實晉晉然而俯反以告商子商子曰梓者子道
也二三子明日見周公入門而趨登堂而跪周公拂其

首勞而食之曰爾安見君子乎禮記曰成王有罪周公則撻伯禽亦其義也

周殊無忤色桓

語庾伯鸞曰

晉東宮百官名曰庾鴻字伯鸞潁川人庾氏譜曰鴻祖義吳國內史父楷左衛將軍

鴻仕至輔國內史

劉叅軍宜停讀書周叅軍且勤學問

桓南郡與道曜講老子王侍中為主簿在坐桓曰王主

簿可顧名思義王未答且大笑桓曰王思道能作大家

兒笑

道曜未詳思道王禎之小字也老子明道禎之字思道故曰顧名思義

祖廣行恒縮頭詣桓南郡始下車桓曰天甚晴朗祖叅

軍如從屋漏中來

祖氏譜曰廣字淵度范陽人父台之仕光祿大夫廣仕至護軍長史

桓玄素輕桓崖崖在京下有好桃玄連就求之遂不得

佳者

崖桓脩小字續晉陽秋曰脩少為玄所侮於言端常嗤鄙之

玄與殷仲文書以

為嗤笑曰德之休明肅慎貢其楛矢如其不爾籬壁間

物亦不可得也

國語曰仲尼在陳有隼集陳侯之庭而死楛矢貫之石砮尺有咫問於仲尼對

曰隼之來遠矣此肅慎之矢也昔武王克商通道于九夷百蠻使各以方賄貢於是肅慎氏貢楛矢古者分異姓之職使不忘服也故分陳以肅慎之貢若求之故府其可得使求得之金櫝如初

輕詆第二十六

王太尉問眉子汝叔名士何以不相推重

眉子已見眉叔王澄也

子曰何有名士終日妄語

庾元規語周伯仁諸人皆以君方樂周曰何樂謂樂殺

邪

史記曰樂殺中山人賢而為燕昭王將軍率諸侯伐齊終於趙

庾曰不爾樂令耳周

曰何乃刻畫無鹽以唐突西子也

列女傳曰鍾離春者齊無鹽之女也其醜

無雙黃頭深目長壯大節鼻昂結喉肥項少髮折腰出胷皮膚若漆行年三十無所容入街嫁不售乃自詣齊宣王乞備後宮因說王以四殆王拜為正后吳越春秋曰越王勾踐得山中採薪女子名曰西施獻之吳王

深公云人謂庾元規名士胷中柴棘三斗許

庾公權重足傾王公庾在石頭王在冶城坐大風揚塵

王以扇拂塵曰元規塵汙人

按王公雅量通濟庾亮之在武昌傳其應下公以識

度裁之囂言自息豈或回貳有扇塵之事乎王隱晉書戴洋傳曰丹陽太守王導問洋得病七年洋曰君侯命在申為土地之主而於申工治火光昭天此為金火相爍水火相炒以故相害導呼治令奕遜使啓鎮東徙今東治是也丹陽記曰丹陽治城去宮三里吳時鼓鑄之所吳平猶不廢又云孫權築治城為鼓鑄之所既立石頭大塢不容近立此小城當是徙縣治空城而置治爾治城疑是金陵本治漢高六年令天下縣邑秣陵不應無獨

王右軍少時甚澀訥在大將軍許王庾二公後來右軍

便起欲去大將軍留之曰爾家司空

王丞相已見

元規復何

所難

王丞相輕蔡公曰我與安期千里共遊洛水邊何處聞

有蔡充兒

晉諸公贊曰充字子尼陳留雍丘人充別傳曰充祖睦蔡邕孫也充少好學有雅尚體貌

尊嚴莫有媒慢於其前者高平劉整有雋才而車服奢麗謂人曰紗縠人常服耳嘗遇蔡子尼在坐終日不自安見憚如此是時陳留為大郡多人士琅邪王澄嘗經郡入境問此郡多士有誰乎吏曰有江應元蔡子尼時陳留多居大位者澄問何以但稱此二人吏曰向謂君侯問人不謂位也澄笑而止充歷成都王東曹掾故稱東曹妒記曰丞相曹夫人性甚忌禁制丞相不得有侍御乃至左右小人亦被檢簡時有妍妙皆加誚責王公不能久堪乃密營別館衆妾羅列兒女成行後元會日夫人於青踈臺中望見兩三兒騎羊皆端正可念夫人

遙見甚憐愛之語婢汝出問是誰家兒給使不達旨乃
答云是第四五等諸郎曹氏聞驚愕大恚命車駕將黃
門及婢二十人人持食刀自出尋討王公亦遽命駕飛
轡出門猶患牛遲乃以左手攀車闌右手捉塵尾以柄
助御者打牛狼狽奔馳劣得先至蔡司徒聞而笑之乃
故詣王公謂曰朝廷欲加公九錫公知不王謂信然自
叙謙志蔡曰不聞餘物唯聞有短轅犢車長柄塵尾王
大愧後貶蔡曰吾昔與安期千里共在洛水集處不聞
天下有蔡充兒正
忿蔡前戲言耳

褚太傅初渡江嘗入東至金昌亭吳中豪右燕集亭中

謝歆金昌亭詩叙曰余尋師來入經吳行達昌門忽覩
斯亭傍川帶河其榜題曰金昌訪之耆老曰昔朱買臣
仕漢還為會稽內史逢其迎吏逆旅北舍與買臣爭席
買臣出其印綬羣吏慚服自裁因事建亭號曰金傷失

其字義耳褚公雖素有重名于時造次不相識別敕左右多

與茗汁少箸粽汁盡輒益使終不得食褚公飲訖徐舉手共語云褚季野於是四坐驚散無不狼狽

王右軍在南丞相與書每歎子姪不令云虎狔虎犢還

其所如

虎狔王彭之小字也王氏譜曰彭之字安壽琅邪人祖正尚書郎父彬衛將軍彭之仕至黃門

郎虎犢彪之小字也彪之字叔虎彭之第三弟年二十而頭鬚皓白時人謂之王白鬚少有局餘之稱累遷至

左光祿大夫

褚太傅南下孫長樂於船中視之

長樂孫綽

言次及劉真長

死孫流涕因諷詠曰人之云亡邦國殄瘁

大雅詩毛公注曰殄盡瘁

也病褚大怒曰真長平生何嘗相比數而卿今日作此面

向人孫回泣向褚曰卿當念我時咸笑其才而性鄙

謝鎮西書與殷揚州為真長求會稽殷答曰真長標同

伐異俠之大者常謂使君降階為甚乃復為之驅馳邪

桓公入洛過淮泗踐北境與諸僚屬登平乘樓眺矚中

原慨然曰遂使神州陸沈百年丘墟王夷甫諸人不得

不任其責

八王故事曰夷甫雖居台司不以事物自嬰當世化之羞言名教自臺郎以下皆雅崇拱

默以遺事為高四海尚寧而識者知其將亂晉陽秋曰
夷甫將為石勒所殺謂人曰吾等若不祖尚浮虛不至
於此袁虎率爾對曰運自有廢興豈必諸人之過桓公懷

然作色顧謂四坐曰諸君頗聞劉景升不

劉鎮南銘曰
表字景升山

陽高平人黃中通理博識多
聞仕至鎮南將軍荊州刺史

有大牛重千斤噉芻豆十

倍於常牛負重致遠曾不若一羸犗魏武入荊州烹以

饗士卒于時莫不稱快意以況袁四坐既駭袁亦失色

袁虎伏滔同在桓公府桓公每遊燕輒命袁伏袁甚恥

之恒歎曰公之厚意未足以榮國士與伏滔比肩亦何

辱如之

高柔在東甚為謝仁祖所重既出不為王劉所知仁祖
曰近見高柔大自敷奏然未有所得真長云故不可在
偏地居輕在角觿

奴角反

中為人作議論高柔聞之云我

就伊無所求人向真長學言此者真長曰我寔亦無
可與伊者然遊燕猶與諸人書可要安固安固者高柔

也

孫統為柔集叙曰柔字世遠樂安人才理清鮮安行
仁義婚泰山胡母氏女年二十既有倍年之學而姿

色清惠近是上流婦人柔家道隆崇既罷司空叅軍安
固令營宅於伏川馳動之情既薄又愛翫賢妻便有終

焉之志尚書令何充取為冠軍叅軍僂俛應命眷戀綢繆不能相舍相贈詩書清婉辛切

劉尹江彪王叔虎孫興公同坐江王有相輕色彪以手

歛叔虎云酷吏詞色甚彊劉尹顧謂此是瞋邪非特是

醜言聲拙視瞻

言江此言非是醜拙似有忿於王也

孫綽作列仙商丘子贊曰所牧何物殆非真豬儻遇風

雲為我龍攄

列仙傳曰商丘子晉者商邑人好吹竽牧豕年七十不娶妻而不老問其道要言但

食老朮菖蒲根飲水如此便不飢不老耳貴戚富室聞而服之不能終歲輒止謂將有匿術孫綽為贊曰商丘卓犖執策吹竽渴飲寒泉飢食菖蒲所牧何物殆非真豬儻逢風雲為我龍攄時人多以為能

王藍田語人云近見孫家兒作文道何物真豬也

桓公欲遷都以張拓定之業孫長樂上表諫此議甚有

理桓見表心服而忿其為異令人致意孫云君何不尋

遂初賦而彊知人家國事

孫綽表諫曰中宗龍飛實賴萬里長江畫而守之耳不然

胡馬久已踐建康之地江東為豺狼之場矣綽賦遂初陳止足之道

孫長樂兄弟就謝公宿言至款雜劉夫人在壁後聽之

具聞其語謝公明日還問昨客何似劉對曰亡兄門未

有如此賓客

夫人劉惔之妹

謝深有愧色

簡文與許玄度共語許云舉君親以為難簡文便不復

答許去後而言曰玄度故可不至於此

按邴原別傳魏五官中郎將嘗

與羣賢共論曰今有一丸藥得濟一人疾而君父俱病與君邪與父邪諸人紛葩或父或君原勃然曰父子一本也亦不復難君親相校自古如此未解簡文誚許意

謝萬壽春敗後還書與王右軍云慙負宿顧右軍推書

曰此禹湯之戒

春秋傳曰禹湯罪己其興也勃焉言禹湯以聖德自罪所以能興今萬失律致

敗雖復自咎其可濟焉故王嘉萬也

蔡伯喈睹睞笛椽孫興公聽妓振且擺折

伏滔長笛賦叙曰余同寮

桓子野有故長笛傳之耆老云蔡邕伯喈之所製也初邕避難江南宿於柯亭之館以竹為椽邕仰眄之曰良竹也取以為笛音聲獨絕歷代傳之至于今王右軍聞大嗔曰三祖壽一作臺

樂器虺瓦

一作虺凡

弔孫家兒打折

王中郎與林公絕不相得王謂林公詭辯林公道王云

箸膩顏恰繪布單衣挾左傳逐鄭康成車後問是何物

塵垢囊

中郎坦之恰帽也裴子曰林公云文度箸膩顏挾左傳逐鄭康成自為高足弟子篤而論之不

離塵垢

囊也

孫長樂作王長史誄云余與夫子交非勢利心猶澄水

同此玄味

禮記曰君子之交淡若水小人之交甘若醴

王孝伯見曰才士不

遜亡祖何至與此人周旋

謝太傅謂子姪曰中郎始是獨有千載車騎曰中郎衿

抱未虛復那得獨有

中郎謝萬

庾道季詫謝公曰裴郎云謝安謂裴郎乃可不惡何得

為復飲酒

庾敳裴啓已見

裴郎又云謝安目支道林如九方臯

之相馬略其玄黃取其雋逸

支遁傳曰遁每標舉會宗而不留心象喻解釋章句

或有所漏文字之徒多以為疑謝安石間而善之曰此九方臯之相馬也略其玄黃而取其雋逸列子曰伯樂

謂秦穆公曰臣所與共僭繆薪菜者有九方臯此其於馬非臣之下也公使行求馬反曰得矣牡而黃使人取之牝而驪公曰毛物牡牝之不知何馬之能知也伯樂曰若臯之觀馬者天機也得其精亡其麤在其內亡其外見其所見不見其所不見視其所視遺其所不視若彼之所相有貴於馬也既而馬果千里足謝公

云都無此二語裴自為此辭耳庾意甚不以為好因陳東亭經酒壚下賦讀畢都不下賞裁直云君乃復作裴

氏學於此語林遂廢今時有者皆是先寫無復謝語

續晉

陽秋曰晉隆和中河東裴啓撰漢魏以來迄于今時言語應對之可稱者謂之語林時人多好其事文遂流行後說太傅事不實而有人於謝坐叙其黃公酒壚司徒王珣為之賦謝公加以與王不平乃云君遂復作裴郎

學自是衆咸鄙其事矣安鄉人有罷中宿縣詣安者安問其歸資答曰嶺南凋弊唯有五萬蒲葵扇又以非時為滯貨安乃取其中者捉之於是京師士庶競慕而服焉價增數倍旬月無賣夫所好生羽毛所惡成瘡痛謝相一言挫成美於千載及其所與崇虛價於百金上之愛憎與奪可不慎哉

王北中郎不為林公所知乃著論沙門不得為高士論大略云高士必在於縱心調暢沙門雖云俗外反更束於教非情性自得之謂也

人問顧長康何以不作洛生詠答曰何至作老婢聲

洛下

書生詠音重濁故云老婢聲

殷顗庾恒並是謝鎮西外孫

謝氏譜曰尚長女僧要適庾鯀次女僧韶適殷歆

殷少而率悟庾每不推嘗俱詣謝公謝公熟視殷曰阿

巢故似鎮西

巢殷顗小字也

於是庾下聲語曰定何似謝公續

復云巢頗似鎮西庾復云頗似足作健不

庾氏譜曰恒字敬則祖亮

父鯀恒仕至尚書僕射

舊目韓康伯將肘無風骨

說林曰范啓云韓康伯似肉鴨

苻宏叛來歸國謝太傅每加接引宏自以有才多好上人坐上無折之者適王子猷來太傅使共語子猷直熟

視良久回語太傅云亦復竟不異人宏大慚而退續晉陽秋

曰宏苻堅太子也堅為姚萇所殺宏將母妻來投詔賜田宅桓玄以宏為將玄敗寇湘中伏誅

支道林入東見王子猷兄弟還人問見諸王何如答曰見一羣白頸烏但聞喚啞啞聲

王中郎舉許玄度為吏部郎郗重熙曰相王好事不可

使阿訥在坐頭訥詢小字

王興道謂謝望蔡霍霍如失鷹師永嘉記曰王和之字興道琅邪人祖翼平

南將軍父胡之司州刺史和之歷永嘉太守正員常侍望蔡謝悵小字也

桓南郡每見人不快輒嗔云君得袁家梨當復不烝食

不舊語秣陵有袁仲家梨甚美大如升入口消釋言愚人不別味得好梨烝食之也

假譎第二十七

魏武少時嘗與袁紹好為游俠觀人新婚因潛入主人園中夜叫呼云有偷兒賊青廬中人皆出觀魏武乃入抽刃劫新婦與紹還出失道墜枳棘中紹不能得動復

大叫云偷兒在此紹遑迫自擲出遂以俱免

曹瞞傳曰操小字阿

瞞少好譎詐遊放無度孫盛雜語云武王少好俠放蕩不修行業嘗私入常侍張讓宅中讓乃手戟於庭踰垣

而出有絕人力
故莫之能害也

魏武行役失汲道軍皆渴乃令曰前有大梅林饒子甘
酸可以解渴士卒聞之口皆出水乘此得及前源

魏武常言人欲危己己輒心動因語所親小人曰汝懷
刃密來我側我必說心動執汝使行刑汝但勿言其使

無他當厚相報執者信焉不以為懼遂斬之此人至死

不知也左右以為實謀逆者挫氣矣

曹瞞傳曰操在軍
康穀不足私語主

者曰何如主者云可以小斛足之操曰善後軍中言操
欺衆操題其主者背以徇曰行小斛盜軍穀遂斬之仍

云特當借汝死以厭衆
心其變詐皆此類也

魏武常云我眠中不可妄近近便斫人亦不自覺左右
宜深慎此後陽眠所幸一人竊以被覆之因便斫殺自
爾每眠左右莫敢近者

袁紹年少時曾遣人夜以劔擲魏武少下不著魏武揆
之其後來必高因帖卧牀上劔至果高

按袁曹後由鼎
踣迹始攜貳自

斯以前不聞警蹕有何
意故而刺之以劔也

王大將軍既為逆頓軍姑孰晉明帝以英武之才猶相

猜憚乃著戎服騎巴寶馬齎一金馬鞭陰察軍形勢未
至十餘里有一客姥居店賣食帝過愒之謂姥曰王敦
舉兵圖逆猜害忠良朝廷駭懼社稷是憂故劬勞晨夕
用相覘察恐形迹危露或致狼狽追迫之日姥其匿之
便與客姥馬鞭而去行敦營匝而出軍士覺曰此非常
人也敦卧心動曰此必黃須鮮卑奴來命騎追之已覺
多許里追士因問向姥不見一黃須人騎馬度此邪姥
曰去已久矣不可復及於是騎人息意而反

異苑曰帝
躬往姑孰

敦時晝寢卓然驚悟曰營中有黃頭鮮卑奴來何不縛取帝所生母荀氏燕國人故貌類焉

王右軍年減十歲時大將軍甚愛之恒置帳中眠大將

軍嘗先出右軍猶未起須臾錢鳳入屏人論事

晉陽秋曰鳳字

世儀吳嘉興尉子也奸惡好利為敦鑑曹叅軍知敦有不臣心因進說後敦敗見誅都忘右軍在

帳中便言逆節之謀右軍覺既聞所論知無活理乃剔

吐汙頭面被褥詐熟眠敦論事造半方意右軍未起相

與大驚曰不得不除之及開帳乃見吐唾從橫信其實

熟眠於是得全于時稱其有智

按諸書皆云王允之事而此言羲之疑誤

陶公自上流來赴蘇峻之難令誅庾公謂必戮庾可以

謝峻

晉陽秋曰是時成帝在襁褓太后臨朝中書令庾亮以元舅輔政欲以風軌格政繩御四海而峻擁

兵近甸為逋逃藪亮圖召峻王導卞壺並不欲亮曰蘇峻豺狼終為禍亂晁錯所謂削亦反不削亦反遂下優

詔以大司農徵之峻怒曰庾亮欲誘殺我也遂克京邑平南溫嶠聞亂號泣登舟遣叅軍王愨期推征西陶侃

為盟主俱赴京師時亮敗績奔嶠人皆尤而少之嶠愈相崇重分兵以配給之庾欲奔竄則不

可欲會恐見執進退無計溫公勸庾詣陶曰卿但遙拜

必無它我為卿保之庾從溫言詣陶至便拜陶自起止

之曰庾元規何緣拜陶士衡畢又降就下坐陶又自要

起同坐坐定庾乃引咎責躬深相遜謝陶不覺釋然

溫公喪婦從姑劉氏家值亂離散唯有一女甚有姿慧姑以屬公覓婚公密有自婚意答曰佳壻難得但如嶠比云何姑云喪敗之餘乞粗存活便足慰吾餘年何敢希汝比卻後少日公報姑云已覓得婚處門地粗可壻身名宦盡不減嶠因下玉鏡臺一枚姑大喜既婚交禮女以手披紗扇撫掌大笑曰我固疑是老奴果如所卜按溫氏譜嶠初取高平李暄女中取琅邪王詡女後取廬江何遜女都不聞取劉氏便為虛謬谷口云劉氏政

謂其姑爾非指其女姓劉也孝標之注亦未為得

玉鏡臺是公為劉越石長史

北征劉聰所得

王隱晉書曰建興二年嶠為劉琨假守左司馬都督上前鋒諸軍事討劉聰晉

陽秋曰聰一名載字玄明屠各人父淵因亂起兵死聰嗣業

諸葛令女庾氏婦既寡誓云不復重出此女性甚正彊

無有登車理

即庾亮子會妻父彪已見上

恢既許江思玄婚乃移家

近之初誑女云宜徙於是家人一時去獨留女在後叱

其覺已不復得出江郎莫來女哭詈彌甚積日漸歇江

彪暝入宿恒在對牀上後觀其意轉帖彪乃詐厭良久

不寤聲氣轉急女乃呼婢云喚江郎覺江於是躍來就

之曰我自是天下男子厭何預卿事而見喚邪既爾相

關不得不與人語女默然而慙情義遂篤

葛令之清英
江君之茂識

必不肯聖人之正典習蠻夷
之穢行康王之言所輕多矣

慙度道人始欲過江與一僮道人為侶謀曰用舊義往

江東恐不辨得食便共立心無義既而此道人不成渡

慙度果講義積年

名德沙門題目曰支慙度才鑒清出
孫綽慙度贊曰支度彬彬好是拔新

俱稟昭見而能越人世重秀異
咸競爾珍孤桐嶧陽浮磬泗濱後有僮人來先道人寄

語云為我致意愍度無義那可立

舊義者曰種智有是而能圓照然則萬累

斯盡謂之空無常住不變謂之妙有而無義者曰種智之體豁如太虛虛而能知無而能應居宗至極其唯無乎

治此計權救饑爾無為遂負如來也

王文度弟阿智惡乃不翅當年長而無人與婚孫興公有一女亦僻錯又無嫁娶理因詣文度求見阿智既見便陽言此定可殊不如人所傳那得至今未有婚處我有一女乃不惡但吾寒士不宜與卿計欲令阿智娶之文度欣然而啓藍田云興公向來忽言欲與阿智婚藍

田驚喜既成婚女之頑嚚欲過阿智方知興公之詐

阿智

王虔之小字虔之字文將辟州別駕不就娶太原孫綽女字阿恒

范玄平為人好用智數而有時以多數失會守失官居東陽桓大司馬在南州故往投之桓時方欲招起屈滯以傾朝廷且玄平在京素亦有譽桓謂遠來投己喜躍非常比入至庭傾身引望語笑歡甚顧謂袁虎曰范公且可作太常卿范裁坐桓便謝其遠來意范雖實投桓而恐以趨時損名乃曰雖懷朝宗會有亡兒瘞在此故

來省視桓悵然失望向之虛佇一時都盡

中興書曰初桓溫請范汪

為征西長史復表為江州並不就還都因求為東陽太守溫甚恨之汪後為徐州溫北伐令汪出梁國失期溫挾憾奏汪為庶人汪居吳後至姑孰見溫溫語其下曰玄平乃來見當以護軍起之汪數日辭歸溫曰卿適來何以便去汪曰數歲小兒喪往年經亂權瘞此境故來迎之事竟去耳溫愈怒之竟不屑意

謝遏年少時好著紫羅香囊垂覆手太傅患之而不欲

傷其意乃譎與賭得即燒之

遏謝玄小字

黜免第二十八

諸葛左在西朝少有清譽為王夷甫所重時論亦以擬

王後為繼母族黨所讒誣之為狂逆將遠徙友人王夷

甫之徒詣檻車與別左問朝廷何以徙我王曰言卿狂

逆左曰逆則應殺狂何所徙

左已見

桓公入蜀至三峽中部伍中有得猿子者

荊州記曰峽長七百里兩

岸連山略無絕處重巖疊障隱天蔽日常有高猿長嘯屬引清遠漁者歌曰巴東三峽巫峽長猿鳴一聲淚沾

裳其母緣岸哀號行百餘里不去遂跳上船至便即絕

破視其腹中腸皆寸寸斷公聞之怒命黜其人

殷中軍被廢在信安終日恒書空作字揚州吏民尋義

逐之竊視唯作咄咄怪事四字而已

晉陽秋曰初浩以中軍將軍鎮壽陽

羗姚襄上書歸降後有罪浩陰圖誅之會關中有變符健死浩偽率軍而行云修復山陵襄前驅恐遂反軍至山桑聞襄將至棄輜重馳保譙襄至據山桑焚其舟實至壽陽略流民而還浩士卒多叛征西溫乃上表黜浩撫軍大將軍奏免浩除名為民浩馳還謝罪既而遷于東陽信安縣

桓公坐有參軍椅烝薤不時解共食者又不助而椅終不放舉坐皆笑桓公曰同盤尚不相助況復危難乎敕令免官

殷中軍廢後恨簡文曰上人箸百尺樓上儋梯將去

續晉

陽秋曰浩雖廢黜夷神委命雅詠不輟雖家人不見其有流放之戚外生韓伯始隨至徙所周年還都浩素愛之送至水側乃詠曹顏遠詩曰富貴它人合貧賤親戚離因泣下其悲見於外者唯此一事而已則書空去梯之言未必皆實也

鄧竟陵免官後赴山陵過見大司馬桓公公問之曰卿

何以更瘦

大司馬察屬名曰鄧遐字應玄陳郡人平南將軍岳之子勇力絕人氣蓋當世時人方之

樊噲為桓溫參軍數從溫征伐歷竟陵太守枋頭之役溫既懷恥忿且憚遐因免遐官病卒

鄧曰有

愧於叔達不能不恨於破甑

郭林宗別傳曰鉅鹿孟敏字叔達敦朴質直客居太

原雜處凡俗未有所名嘗至市貿甑荷擔墮地壞之徑去不顧適遇林宗見而異之因問曰壞甑可惜何以不

顧容曰甄既已破視之何益林宗賞其介決因以知其德性謂必為美士勸令讀書遊學十年遂知名三府並辟不就東夏以為美賢

桓宣武既廢太宰父子仍上表曰應割近情以存遠計若除太宰父子可無後憂簡文手答表曰所不忍言況過於言宣武又重表辭轉苦切簡文更答曰若晉室靈長明公便宜奉行此詔如大運去矣請避賢路桓公讀詔手戰流汗於此乃止太宰父子遠徙新安司馬晞傳曰晞字道升元帝第四子初封武陵王拜太宰少不好學尚武凶恣時太宗輔政晞以宗長不得執權常懷憤慨欲因桓

溫入朝殺之太宗即位新蔡王晃首辭引與晞及子綜謀逆有司奏晞等斬刑詔原之徙新安晞未敗四五年中喜為挽歌自搖大鈴使左右習和之又燕會倡妓作新安人歌舞離別之辭其聲甚悲後果徙新安

桓玄敗後殷仲文還為大司馬咨議意似二三非復往

日大司馬府廳前有一老槐甚扶疎殷因月朔與衆在

廳視槐良久嘆曰槐樹婆娑無復生意

晉安帝紀曰桓玄敗殷仲文歸

京師高祖以其衛從二后且以大信宣令引為鎮軍長史自以名輩先達位遇至重而後來謝混之徒皆疇昔之所附也今比肩同列帝快然自失後遷東陽太守

殷仲文既素有名望自謂必當阿衡朝政忽作東陽太

守意甚不平

晉安帝紀曰仲文後為東陽愈憤怒乃與桓胤謀反遂伏誅仲文嘗照鏡不見頭俄

而難

及之郡至富陽慨然嘆曰看此山川形勢當復出

一孫伯符

孫策富春人故及此而嘆

儉嗇第二十九

和嶠性至儉家有好李王武子求之與不過數十王武

子因其上直率將少年能食之者持斧詣園飽共噉畢

伐之送一車枝與和公問曰何如君李和既得唯笑而

已

晉諸公贊曰嶠性不通治家富擬王公而至儉將有犯義之名語林曰嶠諸弟往園中食李而皆計核責

錢故嶠婦弟
王齊伐之也

王戎儉吝其從子婚與一單衣後更責之

王隱晉書曰戎性至儉不

能自奉養財不出外天下人謂為膏盲之疾

司徒王戎既貴且富區宅僮牧膏田水碓之屬洛下無

比契疏鞅掌每與夫人燭下散籌算計

晉諸公贊曰戎性簡要不治儀

望自遇甚薄而產業過豐論者以為台輔之望不重王隱晉書曰戎好治生園田周徧天下翁嫗二人常以象牙籌晝夜算計家資晉陽秋曰戎多殖財賄常若不足或謂戎故以此自晦也戴逵論之曰王戎晦默於危亂之際獲免憂禍既明且哲於是在矣或曰大臣用心豈其然乎逵曰運有險易時有昏明如子之言則遽瑗季

札之徒皆負責矣自古
而觀豈一王戎也哉

王戎有好李賣之恐人得其種恒鑽其核

王戎女適裴頡貸錢數萬女歸戎色不說女遽還錢乃

釋然

衛江州在尋陽

永嘉流人名曰衛展字道舒河東安邑人祖列彭城護軍父韶廣平令展光熙

初除鷹揚將軍江州刺史

有知舊人投之都不料理唯餉王不留行

一斤此人得餉便命駕

本草曰王不留行生大山治金瘡除風久服之輕身

李弘

範聞之曰家舅刻薄乃復驅使草木

中興書曰李軌字弘範江夏人仕至

尚書郎按軌劉氏之甥
此應弘度非弘範也

王丞相儉節帳下甘果盈溢不散涉春爛敗都督白之

公令舍去曰慎不可令大郎知

王悅也

蘇峻之亂庾太尉南奔見陶公陶公雅相賞重陶性儉
吝及食噉薤庾因留白陶問用此何為庾云故可種於
是大歎庾非唯風流兼有治實

郗公大聚歛有錢數千萬嘉賓意甚不同常朝旦問訊
郗家法子弟不坐因倚語移時遂及財貨事郗公曰汝

正當欲得吾錢耳廼開庫一日令任意用郅公始正謂損數百萬許嘉賓遂一日乞與親友周旋略盡郅公聞之驚怪不能已已

中興書曰趙少卓犖而不羈有曠世之度

汰侈第三十

石崇每要客燕集常令美人行酒客飲酒不盡者使黃門交斬美人王丞相與大將軍嘗共詣崇丞相素不能飲輒自勉強至于沈醉每至大將軍固不飲以觀其變已斬三人顏色如故尚不肯飲丞相讓之大將軍曰自

殺伊家人何預卿事

王隱晉書曰石崇為荊州刺史劫奪殺人以致巨富王丞相德音記

曰丞相素為諸父所重王君夫問王敦聞君從弟佳人又解音律欲一作妓可與共來遂往吹笛人有小忌君夫聞使黃門階下打殺之顏色不變丞相還曰恐此君處世當有如此事兩說不同故詳錄

石崇廁常有十餘婢侍列皆麗服藻飾置甲煎粉沈香

汁之屬無不畢備又與新衣著令出客多羞不能如廁

王大將軍往脫故衣著新衣神色傲然羣婢相謂曰此

客必能作賊

語林曰劉寔詣石崇如廁見有絳紗帳大牀茵蓐甚麗兩婢持錦香囊寔遽反走即

謂崇曰向誤入卿室內崇曰是廁耳

武帝嘗降王武子家武子供饌並用瑠璃器婢子百餘人皆綾羅袴襪以手擎飲食烝純肥美異於常味帝怪而問之答曰以人乳飲純帝甚不平食未畢便去王石

所未知作

襪一作襪

王君夫以粳糲澳釜石季倫用蠟燭作炊君夫作紫絲布步障碧綾裏四十里石崇作錦步障五十里以敵之

石以椒為泥王以赤石脂泥壁

晉諸公贊曰王愷字君夫東海人王肅子也雖

無檢行而少以才力見名有在公之稱既自以外戚晉氏政寬又性至豪舊制鵠不得過江為其羽櫟酒中必

殺人愷為朔軍時得鵠於石崇而養之其大如鶩喙長尺餘純食蛇虺司隸奏按愷崇詔悉原之即燒於都街愷肆其意色無所忌憚為後軍將軍卒諡曰醜

石崇為客作豆粥咄嗟便辦恒冬天得韭蒔藿又牛形狀氣力不勝王愷牛而與愷出遊極晚發爭入洛城崇牛數十步後迅若飛禽愷牛絕走不能及每以此三事為搯腕乃密貨崇帳下都督及御車人問所以都督曰豆至難煮唯豫作熟末客至作白粥以投之韭蒔藿是搗韭根雜以麥苗爾復問馭人牛所以馭馭人云牛本

不遲由將車人不及制之爾急時聽偏轅則駛矣愷悉從之遂爭長石崇後聞皆殺告者

晉諸公贊曰崇性好俠與王愷競相誇衒

也

王君夫有牛名八百里駿常瑩其蹄角王武子語君夫我射不如卿今指賭卿牛以千萬對之君夫既恃手快且謂駿物無有殺理便相然可令武子先射武子一起便破的卻據胡牀叱左右速探牛心來須臾炙至一臠便去

相牛經曰牛經出寧戚傳百里奚漢世河西薛公得其書以相牛千百不失本以負重致遠未服輜

輯故文不傳至魏世高堂生又傳以與晉宣帝其後王
愷得其書焉臣按其相經云陰虹屬頸千里注曰陰虹
者雙筋自尾骨屬頸寧戚所飯者也愷之牛其亦有陰
虹也寧戚經曰樞頭欲得高百體欲得緊大賺疎肋難
齡齡龍頭突口好跳又角欲
得細身欲促形欲得如卷

王君夫嘗責一人無服餘相因直內箸曲閣重閨裏不
聽人將出遂饑經日迷不知何處去後因緣相為垂死
迺得出

石崇與王愷爭豪並窮綺麗以飾輿服

續文章志曰崇
資產累巨萬金

宅室輿馬僭擬王者庖膳必窮水陸之珍後房百數皆
曳紈綉珥金翠而絲竹之藝盡一世之選築榭開沼彈

極人巧與貴戚羊琇王愷之徒競相高以侈靡而崇為居最之首琇等每愧羨以為不及也

武帝愷之甥也每助愷嘗以一珊瑚樹高二尺許賜愷枝柯扶踈世罕其比愷以示崇崇視訖以鐵如意擊之應手而碎愷既惋惜又以為疾己之寶聲色甚厲崇曰不足恨今還卿乃命左右悉取珊瑚樹有三尺四尺條幹絕世光彩溢目者六七枚如愷許比甚衆愷惘然自失

南州異物志曰珊瑚生大秦國有洲在漲海中距其國七八百里名珊瑚樹洲底有盤石水深二十餘丈珊瑚生於石上初生白軟弱似菌國人乘大船載鐵網先沒在水下一年便生網目中其色尚黃枝柯交錯高

三四尺大者圍尺餘三年色赤便以鐵鈔發其根繫鐵網於船絞車舉網還裁鑿恣意所作若過時不鑿便枯索蟲蠱其大者輸之王府細者賣之廣志曰珊瑚大者可為車軸

王武子被責移第北邙下

晉諸公贊曰濟與從兄恬不平濟為河南尹未拜行過王

官吏不時下道濟於車前鞭之有司奏免官論者以于濟為不長者尋轉太僕而王恬已見委任濟遂斥外

時人多地貴濟好馬射買地作埽編錢匝地竟埽時人

號曰金溝

溝一作埽

石崇與王敦入學戲見顏原象

家語曰顏回字子淵魯人少孔子二十九歲而

髮白三十二歲蚤死原憲已見

而嘆曰若與同升孔堂去人何必有間

王曰不知餘人云何子貢去卿差近

史記曰端木賜字子貢衛人嘗相魯

家累千金

石正色云士當令身名俱泰何至以鑿牖語

終于齊

人

原憲以鑿為牖

彭城王有快牛至愛惜之

朱鳳晉書曰彭城穆王權字子興宣帝弟虓子太始元年

封王太尉與射賭得之彭城王曰君欲自乘則不論若

欲噉者當以二十肥者代之既不廢噉又存所愛王遂

殺噉

王右軍少時在周侯末坐割牛心噉之於此改觀

俗以牛心

為貴故義
之先食之

忿狷第三十一

魏武有一妓聲最清高而性情酷惡欲殺則愛才欲置
則不堪於是選百人一時俱教少時還有一人聲及之
便殺惡性者

王藍田性急嘗食雞子以筯刺之不得便大怒舉以擲
地雞子於地圓轉未止仍下地以屐齒蹶之又不得瞋
甚復於地取內口中齧破即吐之王右軍聞而大笑曰

使安期有此性猶當無一毫可論況藍田邪

中興書曰
述清貴簡

正少所推屈唯以性急為累
安期述父也有名德已見

王司州嘗乘雪往王螭許

王胡之王恬並已
見恬小字螭虎

司州言氣

少有悟逆於螭便作色不夷司州覺惡便輿牀就之持

其臂曰汝詎復足與老兄計

按王氏譜胡之
是恬從祖兄

螭撥其手

曰冷如鬼手馨彊來捉人臂

桓宣武與袁彥道擣蒲袁彥道齒不合遂厲色擲去五

木溫太真云見袁生遷怒知顏子為貴

論語曰哀公問
弟子孰為好學

孔子曰有顏回者好學不遷
怒不貳過不幸短命死矣

謝無奕性麤彊以事不相得自往數王藍田肆言極罵
王正色面壁不敢動半日謝去良久轉頭問左右小吏
曰去未答云已去然後復坐時人嘆其性急而能有所
容

王令詣謝公值習鑿齒已在坐當與併榻王徙倚不坐
公引之與對榻去後語胡兒曰子敬實自清立但人為
爾多矜咳殊足損其自然

劉謙之晉紀曰王獻之
性甚整峻不交非類

王大王恭嘗俱在何僕射坐

中興書曰何澄字子玄清正有器望歷尚書左僕射

恭時為丹陽尹大始拜荊州

靈鬼志謠徵曰初桓石民為荊州鎮土時民忽歌黃

曇曲曰黃曇英揚州大佛來士朋少時石民死王忱為荊州佛大忱小字也

訖將乖之際大

勸恭酒恭不為飲大逼彊之轉苦便各以帟帶繞手恭府近千人悉呼入齋大左右雖少亦命前意便欲相殺何僕射無計因起排坐二人之間方得分散所謂勢利之交古人羞之

桓南郡小兒時與諸從兄弟各養鵝共鬪南郡鵝每不

如甚以為忿廼夜往鵠欄間取諸兄弟鵠悉殺之既曉家人咸以驚駭云是變怪以白車騎車騎曰無所致怪當是南郡戲耳問果如之

讒險第三十二

王平子形甚散朗內實勁俠

鄧粲晉紀云劉琨嘗謂澄曰卿形雖散朗而內勁狹

以此處世難得其死澄默然無以答後果為王敦所害劉琨聞之曰自取死耳

袁悅有口才短長說亦有精理始作謝玄參軍頗被禮遇後丁艱服除還都唯齋戰國策而已語人曰少年

時讀論語老子又看莊易此皆是病痛事當何所益邪
天下要物正有戰國策既下說司馬孝文王大見親待

幾亂機軸俄而見誅

袁氏譜曰悅字元禮陳郡陽夏人父朗給事中仕至驃騎咨議太元

中悅有寵於會稽王每勸專攬朝權王頗納其言王恭聞其說言於孝武乃託以他罪殺悅於市中既而朋黨同異之聲播於朝野矣

孝武甚親敬王國寶王雅

雅別傳曰雅字茂建東海沂人少知名晉安帝紀曰雅

之為侍中孝武甚信而重之王珣王恭特以地望見禮至於親幸莫及雅者上每置酒燕集或召雅未至上不先舉觴時議謂珣恭宜傳東宮而雅薦王珣於帝帝欲雅以寵幸超授太傅尚書左僕射雅薦王珣於帝帝欲

見之嘗夜與國寶及雅相對帝微有酒色令喚珣垂至
已聞卒傳聲國寶自知才出珣下恐傾奪其寵因曰王
珣當令名流陛下不宜有酒色見之自可別詔召也帝
然其言心以為忠遂不見珣

王緒數讒殷荊州於王國寶殷甚患之求術於王東亭
曰卿但數詣王緒往輒屏人因論它事如此則二王之
好離矣殷從之國寶見王緒問曰比與仲堪屏人何所
道緒云故是常往來無它所論國寶謂緒於已有隱果

情好日疎讒言以息

按國寶得寵於會稽王由緒獲進同惡相求有如市賈終至誅夷曾

不攜貳豈有仲堪

微間而成離隙

尤悔第三十三

魏文帝忌弟任城王驍壯因在卞太后閣共圍碁並噉棗文帝以毒置諸棗蒂中自選可食者而進王弗悟遂

雜進之既中毒太后索水救之帝預敕左右毀餅罐太

后徒跣趨井無以汲須臾遂卒

魏略曰任城威王彰字子文太祖卞太后第二

子性剛勇而黃須北伐代郡獨與麾下百餘人突虜而走太祖聞曰我黃須兒可用也魏志春秋曰黃初三年

彰來朝初彰問璽綬將有異志故來朝不即得見有此忿懼而暴薨復欲害東阿太后曰

汝已殺我任城不得復殺我東阿

魏志方伎傳曰文帝問占夢周宣吾夢磨

錢文欲滅而愈更明何謂宣悵然不對帝固問之宣曰陛下家事雖欲爾而太后不聽是以欲滅更明耳帝欲治弟植之罪逼於太后但加貶爵

王渾後妻琅邪顏氏女王時為徐州刺史交禮拜訖王將答拜觀者咸曰王侯州將新婦州民恐無由答拜王乃止武子以其父不答拜不成禮恐非夫婦不為之拜謂之顏妾顏氏恥之以其門貴終不敢離

婚姻之禮人道之大豈由

一不拜而遂為妾媵者乎
世說之言於是乎紕繆

陸平原河橋敗為盧志所讒被誅

王隱晉書曰成都王

為都督前鋒諸軍事機別傳曰成都王長史盧志與機
弟雲趣舍不同又黃門孟玖求為邯鄲令於穎穎教付
雲雲時為左司馬曰刑餘之人不可以君民玖聞此怨
雲與志讒構日至及機於七里澗大敗玖誣機謀反所
致穎乃使牽秀斬機先是夕夢黑幔繞車手決不開惡
之明旦秀兵奄至機索戎服著衣帛見秀容貌自若遂
見害時年四十三軍士莫不流涕是日天地霧合大風
折木平地尺雪于寶晉紀曰初陸抗誅步闡百口皆盡
有識尤之及機雲臨刑歎曰欲聞華亭鶴唳可復得乎
見害三族無遺

八王故事曰華亭吳由拳縣郊外墅也有清泉茂林吳
平後陸機兄弟共遊於此十餘年語林曰機為河北都

督聞警角之聲謂孫丞曰聞此不
如華亭鶴唳故臨刑而有此嘆

劉琨善能招延而拙於撫御一日雖有數千人歸投其

逃散而去亦復如此所以卒無所建

鄧粲晉紀曰琨為并州牧紀合齊盟

驅率戎旅而內不撫其民遂至喪軍失士無成功也敬
徹按琨以永嘉元年為并州于時晉陽空城寇盜四攻
而能收合士衆抗行淵勒十年之中敗而能振不能撫
御其得如此乎凶荒之日千里無烟豈一日有數千人
歸之若一日數千人去之又
安得一紀之間以對大難乎

王平子始下丞相語大將軍不可復使羌人東行平子

面似羌

按王澄自為王敦所害丞
相名德豈應有斯言也

王大將軍起事丞相兄弟詣闕謝周侯深憂諸王始入甚有憂色丞相呼周侯曰百口委卿周直過不應既入若相存救既釋周大說飲酒及出諸王故在門周曰今年殺諸賊奴當取金印如斗大繫肘後大將軍至石頭問丞相曰周侯可為三公不丞相不答又問可為尚書令不又不應因云如此唯當殺之耳復默然逮周侯被害丞相後知周侯救己嘆曰我不殺周侯周侯由我而死幽冥中負此人

虞預晉書曰敦克京邑參軍呂漪說敦曰周顗戴淵皆有名望足以惑衆

視近日之言無慙懼之色若不除之役將未歇也敦即
然之遂害淵顓初嶠為臺郎淵既上官素有高氣以嶠
小器待之故
售其說焉

王導溫嶠俱見明帝帝問溫前世所以得天下之由溫
未答頃王曰溫嶠年少未諳臣為陛下陳之王廼具叙
宣王創業之始誅夷名族寵樹同己及文王之末高貴
鄉公事
宣王創業誅曹爽任蔣濟之流
者是也高貴鄉公之事已見上明帝聞之覆面
箸牀曰若如公言昨安得長

王大將軍於衆坐中曰諸周由來未有作三公者有人

答曰唯周侯邑五馬領頭而不克大將軍曰我與周洛

下相遇一面頓盡值世紛紜遂至於此因為流涕

晉紀

曰王敦叅軍有於敦坐擣蒲臨當成都馬頭被殺因謂曰周家奕世令望而位不至三公伯仁垂作而不果有似下官此馬敦慨然流涕曰伯仁總角時與於東宮相遇一面披衿便許之三司何圖不幸王法所裁悽愴之深言何能盡

溫公初受劉司空使勸進母崔氏固駐之嶠絕裾而去

溫氏譜曰嶠父禮娶清河崔叅女

迄於崇貴鄉品猶不過也每爵皆發

詔虞預晉書曰元帝即位以溫嶠為散騎侍郎嶠以母亡逼賊不得往臨葬固辭詔曰嶠以未葬朝議又頗

有異同故不拜其令
入坐議吾將折其衷

庾公欲起周子南子南執辭愈固庾每詣周庾從南門
入周從後門出庾嘗一往奄至周不及去相對終日庾
從周索食周出蔬食庾亦彊飯極歡并語世故約相推
引同佐世之任既仕至將軍二千石

尋陽記曰周邵字
子南與南陽翟湯

隱於尋陽廬山庾亮臨江州聞翟周之風束帶躡履而
詣焉聞庾至轉避之亮後密往值邵彈鳥於林因前
與語還便云此人可起即拔為鎮蠻護軍西陽太守其
集載與邵書曰西陽一郡戶口差實非履道真純何以
鎮其流遁詢之朝野僉曰足下
今具上表請足下臨之無讓
而不稱意中宵慨然曰

大丈夫乃為庾元規所賣一嘆遂發背而卒

阮思曠奉大法敬信甚至大兒年未弱冠忽被篤疾

阮氏

譜曰牖字彥倫裕長子也仕至州主簿

兒既是偏所愛重為之祈請三寶

晝夜不懈謂至誠有感者必當蒙祐而兒遂不濟於是

結恨釋氏宿命都除

以阮公智識必無此弊脫此非謬何其惑歟夫文王期盡聖子不能

駐其年釋種誅夷神力無以延其命故業有定限報不可移若請禱而望具靈匪驗而忽其道固陋之徒耳豈可以言神明之智者哉

桓宣武對簡文帝不甚得語廢海西後宜自申叙乃豫

撰數百語陳廢立之意既見簡文簡文便泣下數十行
宣武矜愧不得一言

桓公卧語曰作此寂寂將為文景所笑既而屈起坐曰

既不能流芳百世亦不足復遺臭萬載邪

續晉陽秋曰桓溫既以雄

武專朝任兼將相其不臣之心形于音迹曾卧對親僚撫枕而起曰為爾寂寂為文景所笑衆莫敢對

謝太傅於東船行小人引船或遲或速或停或待又放

船從橫撞人觸岸公初不呵譴人謂公常無嗔喜曾送

兄征西葬還

征西謝弈

日暮雨駛小人皆醉不可處分公乃

於車中手取車柱撞馭人聲色甚厲夫以水性沈柔入

隘奔激方之人情固知迫隘之地無得保其夷粹

孟子曰湍

水決之東則東決之西則西搏而躍之可使過顙激而行之可使在山豈水之性哉人可使為不善性亦猶是也

簡文見田稻不識問是何草左右答是稻簡文還三日

不出云寧有賴其末而不識其本

文公種菜曾子牧羊縱不識稻何所多悔

此言必虛

桓車騎在上明政獵東信至傳淮上大捷語左右云羣

謝年少大破賊因發病薨談者以為此死賢於讓揚之

荆續晉陽秋曰桓沖本以將相異宜才用不同村已德量不及謝安故解揚州以讓安自謂少經軍鎮及為

荆州聞苻堅自出淮淝深以根本為慮遣其隨身精兵二千入赴京師時安已遣諸軍且欲外示閒暇因令冲軍還冲大驚曰謝安乃有廟堂之量不嫻將略吾量賊必破襄陽而并力淮淝今大敵果至方遊談示暇遣諸不經事少年而實寡弱天下誰知吾其左社矣俄聞大勲克舉慚慨而薨

桓公初報破殷荆州

周祇隆安記曰仲堪以人情注於玄疑朝廷欲以玄代已遣道人竺

僧憊齋寶物遺相王寵幸媒尼左

曾講論語至富與貴

是人之所欲不以其道得之不處

孔安國注曰不以其道得富貴則仁者不處

玄意色甚惡

純漏第三十四

王敦初尚主

敦尚武帝女舞陽公主字修禕

如廁見漆箱盛乾棗本以

塞鼻王謂廁上亦下果食遂至盡既還婢擎金澡盤盛水瑠璃盥盛澡豆因倒箸水中而飲之謂是乾飯羣婢莫不掩口而笑之

元皇初見賀司空言及吳時事問孫皓燒鋸截一賀頭

是誰司空未得言元皇自憶曰是賀劭

劭即循父也皓凶暴驕矜劭上

書切諫皓深恨之親近憚劾貞正譖云謗毀國事被詰責後還復職劾中惡風口不能言語皓疑劾託疾收付酒藏考掠千數卒無一言遂殺之司空流涕曰臣父遭遇無道創巨痛

深無以仰答明詔

禮云創巨者其日久痛深者其愈遲

元皇愧慙三日不

出

蔡司徒渡江見彭蜺大喜曰蟹有八足加以二螯令烹之既食吐下委頓方知非蟹後向謝仁祖說此事謝曰

卿讀爾雅不熟幾為勸學死

大戴禮勸學篇曰蟹二螯八足非蛇蠃之穴無所寄

託者用心躁也故蔡邕為勸學章取義焉爾雅曰蝟蟬小者勞即彭蜺也似蟹而小今彭蜺小於蟹而大於彭

蝟即爾雅所謂蝟蟬也然此三物皆八足二螯而狀甚相類蔡謨不精其小大食而致弊故謂讀爾雅不熟也任育長年少時甚有令名武帝崩選百二十挽郎一時之秀彥育長亦在其中王安豐選女壻從挽郎摻其勝者且擇取四人任猶在其中童少時神明可愛時人謂育長影亦好自過江便失志王丞相請先度時賢共至石頭迎之猶作疇日相待一見便覺有異坐席竟下飲便問人云此為茶為茗覺有異色乃自申明云向問飲為熱為冷耳嘗行從棺邸下度流涕悲哀王丞相聞之

曰此是有情癡

晉百官名曰仕瞻字育長樂安人父琨少府卿瞻歷謁者僕射都尉天門太守

謝虎子嘗上屋熏鼠

虎子據小字據字玄道尚書褒第二子年三十三亡

胡兒既

無由知父為此事聞人道癡人有作此者戲笑之時道

此非復一過太傅既了己之不知因其言次語胡兒曰

世人以此謗中郎亦言我共作此

中郎據也章仲反按世有兄弟三人則謂

第二者為中今謝昆弟有六而以據為中郎未可解當由有三時以中為稱因仍不改也

胡兒懊熱

一月日閉齋不出太傅虛託引己之過以相開悟可謂

德教

殷仲堪父病虛悸聞牀下蟻動謂是牛鬪

殷氏譜曰殷師字師子祖

識父融並有名師至驃騎咨議生仲堪續晉陽秋曰仲堪父曾有失心病仲堪腰不解帶彌年父卒

孝武

不知是殷公問仲堪有一殷病如此不仲堪流涕而起

曰臣進退唯谷

大雅詩也毛公注曰谷窮也

虞嘯父為孝武侍中帝從容問曰卿在門下初不聞有

所獻替虞家富春近海謂帝望其意氣對曰天時尚煥

鰲魚蝦鯨未可致尋當有所上獻帝撫掌大笑

中興書曰嘯父

會稽人光祿潭之孫右將軍純之子少歷顯位與王廙同廢為庶人義旗初為會稽內史

王大喪後朝論或云國寶應作荊州

晉安帝紀曰王忱死會稽王欲以國

寶代之孝武中詔用仲堪乃止

國寶主簿夜函白事云荊州事已行國

寶大喜而夜開閣喚綱紀話勢雖不及作荊州而意色甚恬曉遣參問都無此事即喚主簿數之曰卿何以誤人事邪

惑溺第三十五

魏甄后惠而有色先為袁熙妻甚獲寵曹公之屠鄴也令疾召甄左右白五官中郎已將去公曰今年破賊正

為奴

魏略曰建安中袁紹為中子熙娶甄會女紹死熙出在幽州甄留侍姑及鄴城破五官將從而入紹

舍見甄怖以頭伏姑鄰上五官將謂紹妻袁夫人扶甄令舉頭見其色非凡稱歎之太祖聞其意遂為迎娶擅室數歲世語曰太祖下鄴文帝先入袁尚府見婦人披髮垢面垂涕立紹妻劉後文帝問知是熙妻使令攬髮以袖拭面姿容絕倫既遇劉謂甄曰不復死矣遂納之有子魏氏春秋曰五官將納熙妻也孔融與太祖書曰武王伐紂以妲己賜周公太祖以融博學真謂書傳所記後見融問之對曰以今度古想其然也

荀奉倩與婦至篤冬月婦病熱乃出中庭自取冷還以

身熨之婦亡奉倩後少時亦卒以是獲譏於世

梁別傳曰梁常

以婦人才智不足論自宜以色為主驃騎將軍曹洪女有色聚於是聘焉容服惟悵甚麗專房燕婉歷年後婦

病亡未殯傳嘏往嘏粲粲不明而神傷嘏問曰婦人才色並茂為難子之聘也遺才存色非難遇也何哀之甚粲曰佳人難再得顧逝者不能有傾城之異然未可易遇也痛悼不能己已歲餘亦亡亡時年二十九粲簡貴不與常人交接所交者一時俊傑至葬夕赴期者裁十餘人悉同年相知名士也哭之感慟路人粲雖褊隘以燕婉自喪然有識猶追惜其能言

奉倩曰婦人德不足稱當以色為主

裴令聞之曰此乃是興到之事非盛德言冀後人未昧

此語

何劭論粲曰仲尼稱有德者有言而荀

賈公閻

充別傳曰充父達晚有子故名曰充字公閻言後必有充閻之異

後妻郭氏酷

妒有男兒名黎民生載周充自外還乳母抱兒在中庭

兒見充喜踊充就乳母手中鳴之郭遙望見謂充愛乳

母即殺之兒悲思啼泣不飲他乳遂死郭後終無子

晉諸

公贊云郭氏即賈后母也為性高朗知后無子甚憂愛
愍懷每勸厲之臨亡誨賈后令盡意於太子言甚切至
趙充華及賈謐母並勿令出入宮中又曰此皆亂汝事
后不能用終至誅夷臣按傳暢此言則郭氏賢明婦人
也向令賈后撫愛愍懷豈當縱其妒悍自斃其子然則物我不同或老壯情異乎

孫秀降晉晉武帝厚存寵之

太原郭氏錄曰秀字彥才吳郡吳人為下口督甚有

威恩孫皓憚欲除之遣將軍何定遡江而上辭以捕鹿
三千口供厨秀豫知謀遂來歸化世祖喜之以為驃騎
將軍交妻以妹妹薊氏室家甚篤妻嘗妒乃罵秀為貉
州牧

子

晉陽秋曰蒯氏襄陽人祖良吏部尚書父鈞南陽太守

秀大不平遂不復入蒯

氏大自悔責請救於帝時大赦羣臣咸見既出帝獨留秀從容謂曰天下曠蕩蒯夫人可得從其例不秀免冠而謝遂為夫婦如初

韓壽美姿容賈充辟以為掾充每聚會賈女於青璫中看見壽說之恒懷存想發於吟咏後婢往壽家具述如此并言女光麗壽聞之心動遂請婢潛修音問及期往宿壽躑捷絕人踰牆而入家中莫知

晉諸公贊曰壽字德真南陽潁陽人

曾祖暨魏司徒有高行壽敦家風性忠厚豈有若斯之事諸書無聞唯見世說自未可信自是充覺

女盛自拂拭說暢有異於常後會諸吏聞壽有奇香之

氣是外國所貢一著人則歷月不歇

十洲記曰漢武帝時西域月氏國王

遣使獻香四兩大如雀卵黑如桑椹燒之芳氣經三月不散蓋此香也

充計武帝唯賜已

及陳騫餘家無此香疑壽與女通而垣牆重密門閤急

峻何由得爾乃託言有盜令人修牆使反曰其餘無異

唯東北角如有人跡而牆高非人所踰充乃取女左右

婢考問即以狀對充祕之以女妻壽

郭子謂與韓壽通者乃是陳騫女即

以妻壽未婚而女亡壽因娶賈氏故世因傳是克女

王安豐婦常卿安豐安豐曰婦人卿壻於禮為不敬後勿復爾婦曰親卿愛卿是以卿卿我不卿卿誰當卿卿遂恒聽之

王丞相有辛妾姓雷頗預政事納貨蔡公謂之雷尚書

語林曰雷有寵生恬洽

仇隙第三十六

孫秀既恨石崇不與綠珠

干寶晉紀曰石崇有妓人綠珠美而工笛孫秀使人求之

欽定四庫全書

卷下之下

崇別館北邙下方登涼觀臨清水使者以告崇出其婢妾數十人以示之曰任所以擇使者曰本受命者指綠珠也未識孰是崇勃然曰綠珠吾所愛不可得也使者曰君侯博古知今察遠照邇願加三思崇不然使者已出又反崇竟不許

又憾潘岳昔遇之不以禮後秀為中書令岳

省內見之因喚曰孫令憶疇昔周旋否秀曰中心藏之

何日忘之岳於是始知不免

王隱晉書曰岳父文德為琅邪太守孫秀為小

吏給使岳數蹴蹋秀而不以人遇之也

後收石崇歐陽堅石同日收岳

晉

秋曰歐陽建字堅石渤海人有才藻時人為之語曰渤海赫赫歐陽堅石初建為馮翊太守趙王倫為征西將軍孫秀為腹心撓亂關中建每匡正由是有隙王隱晉書曰石崇潘岳與賈謐相友善及謐廢懼終見危與淮

南王謀誅倫事泄收崇及親暮以上皆斬之初岳母誠岳以止足之道及收與母別曰負阿母崇家河北收者至曰吾不過流徙交廣耳及車載東市始嘆曰奴輩利吾家之財收崇人曰知財為害何不蚤散崇不能答

石先送市亦不相知潘後至石謂潘曰安仁卿亦復爾

邪潘曰可謂白首同所歸

語林曰潘石同刑東市石謂潘曰天下殺英雄卿復何為

潘曰俊士填溝壑餘波來及人

潘金谷集詩云投分寄石友白首同所

歸乃成其讖

劉璵兄弟少時為王愷所憎嘗召二人宿欲默除之令作阮阮畢垂加害矣石崇素與璵琨善聞就愷宿知當

有變便夜往詣愷問二劉所在愷卒迫不得諱答云在後齋中眠石便徑入自牽出同車而去語曰少年何以

輕就人宿

劉粲晉紀曰琨與兄璆俱知名遊權貴之間當世以為豪傑

王大將軍執司馬愨王夜遣世將載王於車而殺之當

時不盡知也

晉陽秋曰司馬承字元敬譙王遜子也為中宗相州刺史路過武昌王敦與燕會酒

酣謂承曰大王篤實佳士非將御之才對曰焉知鈐刀不能一割乎敦將謀逆召承為軍司馬承嘆曰吾其死

矣地荒民解勢孤援絕赴君難忠也死王事義也死忠與義又何求焉乃馳檄諸郡丞赴義敦遣從母弟魏乂

攻丞王廙使賊迎之薨於車雖愨王家亦未之皆悉而敦既滅追贈驃騎諡曰愨王

無忌兄弟皆穉

無忌別傳曰無忌字公壽丞子也才器兼濟有文武幹襲封譙王衛軍將軍

王胡之與無忌長甚相暱胡之嘗共遊無忌入告母請

為饌母流涕曰王敦昔肆酷汝父假手世將

司馬氏譜曰丞娶南

陽趙氏女王廙別傳曰廙字世將祖覽父正廙高朗豪率王導庾亮遊於石頭會廙至爾日迅風飛颿廙倚船樓長嘯神氣甚逸導謂亮曰世將為復識事亮曰正足舒其逸耳性倨傲不合己者面拒之故為物所疾加平

南將吾所以積年不告汝者王氏門彊汝兄弟尚幼不

欲使此聲著蓋以避禍耳無忌驚號抽刃而出胡之去

已遠

應鎮南作荊州

王隱晉書曰應詹字思遠汝南南頓人璩曾孫也為人弘長有淹度飾之以文

才司徒何充嘆曰所謂文質之士累遷江州刺史鎮南將軍

王修載譙王子無忌同

至新亭與別坐上賓甚多不悟二人俱到有一客道譙

王丞致禍非大將軍意正是平南所為耳無忌因奪直

兵參軍刀便欲斫脩載走投水舸上人接取得免

中興書曰

褚褒為江州無忌於坐拔刀斫者之褒與桓景共免之御史奏無忌欲專殺害詔以贖論前章既言無忌母告之而此章復云客叙其事且王廙之害司馬丞遐邇共悉脩齡兄弟豈容不知法盛之言皆實錄也

王右軍素輕藍田藍田晚節論譽轉重右軍尤不平藍

田於會稽丁艱停山陰治喪右軍代為郡屢言出弔連
日不果後詣門自通主人既哭不前而去以凌辱之於
是彼此嫌隙大構後藍田臨揚州右軍尚在郡初得消
息遣一叅軍詣朝廷求分會稽為越州使人受意失旨
大為時賢所笑藍田密令從事數其郡諸不法以先有
隙令自為其宜右軍遂稱疾去郡以憤慨致終中興書
曰羲之
與述志尚不同而兩不相能述為會稽艱居郡境王羲
之後為郡申慰而已初不重詣述深以為恨喪除徵拜
揚州就徵周行郡境而不歷羲之臨發一別而去羲之
初語其友曰王懷祖免喪正可當尚書投老可得為僕

射更望會稽便自邈然述既顯授又檢校會稽郡求其得失主者疲於課對羲之恥慨遂稱疾去郡墓前自誓不復仕朝廷以其誓苦不復徵也

王東亭與孝伯語後漸異孝伯謂東亭曰卿便不可復

測答曰王陵廷爭陳平從默但問克終云何耳

漢書曰呂后欲

王諸呂問右相王陵以為不可問左丞相陳平平曰可陵出讓平平曰面折廷爭臣不如君全社稷定劉氏君不如臣晉安帝紀曰初王恭赴山陵欲斬國寶王珣固諫之乃止既而恭謂珣曰此日視君一似胡廣珣曰王陵廷爭陳平從默但問克終如何也

王孝伯死縣其首於大桁司馬太傅命駕出至標所熟

視首曰卿何故趣欲殺我邪續晉陽秋曰王恭深懼禍難抗表起兵於是遣左將

軍謝琰討恭恭敗走曲阿為湖浦尉所擒初道子與恭善欲載出都面相折數聞西軍之逼乃令於兒塘斬之

梟首於東衙也


桓玄將篡桓脩欲因玄在脩母許襲之庾夫人云汝等

近過我餘年我養之不忍見行此事

桓氏譜曰恒冲後娶潁川庾茂女字

姚晉安帝紀曰脩少為玄所侮言論常鄙之脩深憾焉密有圖玄之意脩母曰靈寶視我如母汝等何忍骨肉

相圖脩乃止



世說新語卷下之下